


T2572/3808 (3)

CHINESE - JAPANESE LIBRARY III
HARVARD - YENCHING INSTITUTE
AT HARVARD UNIVERSITY
AUG 22 1939



人代紀要

丙

人代紀要卷之六

庚辰秦始皇帝二十六年是年初混一天下稱皇帝始

王賁攻齊齊王建降齊亡

齊本齊後媽姓封于陳自陳完奔齊改姓田氏

五傳至田乞專齊政又四傳至田和遂有齊國

七世一百七十年為秦



年佳悅保同校

八代紀要卷之六

哈佛大學漢和
圖書館珍藏印

明吳興一顧

大埔黃宸校刊

應祥編集
江陰湯明善

庠生倪佩同校

庚辰秦始皇帝二十六年是年初混一天下稱皇帝始

王賁攻齊齊王建降齊亡

齊本舜後嬀姓封于陳自陳完奔齊改姓田氏

五傳至田乞專齊政又四傳至田和遂有齊國

受周安王命為諸侯傳七世一百七十年為秦

所滅

是年始以建亥月爲歲首分天下爲三十六郡罷封建

作受命璽其文曰受命于天既壽永昌

辛巳 西巡狩

壬午 東巡上鄒嶧封泰山禪梁父登琅邪俱立石遣徐市入海求神僊

癸未 東巡至博浪沙韓張良槌擊不中登之罘刻石

甲申

乙酉 使黔首自實田

丙戌 北巡遣蒙恬擊胡

丁亥 取南越置桂林南海象郡

築長城自臨洮至遼東萬餘里

戊子 焚書

己丑 坑儒 廣阿房宮 使長子扶蘇監蒙恬軍

庚寅 隕石東郊

辛卯 南巡至雲夢祀虞舜上會稽探禹穴立石頌德

秋七月至沙丘崩宦者趙高與丞相李斯矯遺詔

立少子胡亥賜扶蘇蒙恬死扶蘇自殺蒙恬不肯

死繫陽周胡亥即位是爲二世皇帝 恬亦自殺

壬辰秦二世皇帝元年

以趙高治獄誅戮大臣殺諸王公主 復作阿房宮 發閭左戍陳勝吳廣起兵於蕪據陳陳勝自立爲王號張楚吳廣爲假王

陳勝字涉陽城人吳廣字叔陽夏人秦二世發閭左戍漁陽勝廣爲屯長恐失期當斬乃殺尉令以起詐稱公子扶蘇楚將項燕攻蕪下之遂破陳諸郡縣苦秦苛政咸殺長吏以應之張耳陳餘勸勝立六國後樹黨以分秦力勝不能從乃自立

陳人武臣自立爲趙王以陳餘爲大將軍張耳爲

右丞相

張耳陳餘俱大梁人魏亡秦購求耳千金餘五百金俱變姓名亡匿陳涉起乃從之餘說涉以奇兵徇趙涉乃以故所善者陳人武臣爲將軍號武信君耳餘爲左右校尉北畧趙地下三十餘城耳餘怨陳王不用其策又聞諸將爲陳王徇地多者以讒得罪乃勸武臣王趙

沛人劉邦起兵自立爲沛公

劉邦字季初爲泗上亭長單父呂公奇其狀貌妻以女送徒驪山多道亡乃縱之曰公等皆去

吾亦從此逝矣徒中壯士從者十餘人夜行澤
中有大蛇當道拔劍斬之後至者云有老嫗哭
曰吾子白帝子爲赤帝子所殺叱之不見時沛
令欲起兵應陳涉主吏蕭何曹參曰君爲秦吏
背之不可乃召劉季令悔閉城不納季射帛書
遺沛父老陳利害父老率子弟殺令迎入立爲
沛公是爲漢高祖

楚人項梁起兵於吳

項梁楚將項燕之子嘗殺人與兄子籍避仇吳
中籍字羽長八尺餘目有重瞳力能扛鼎會稽

守殷通欲起兵應陳涉梁乃使籍殺通得子弟
八千人自爲會稽守以籍爲裨將年二十四是
爲楚霸王

齊族田儋與從弟榮橫起兵于齊儋自立爲齊王
陳涉將韓廣畧燕地自立爲燕王

趙王武臣爲燕所執囚之欲分趙地使者往請俱
被殺有廝養卒徑造燕營說之燕釋趙王歸

古樂府有邯鄲才人嫁廝養卒說者謂趙王歸
而以美人與廝養卒然史傳無考

陳涉將周市立魏公子咎爲魏王而相之

秦廢衛君角爲庶人

衛自康叔受封至角凡四十三世歷九百八年
癸巳 秦兵圍沛公於豐沛公出戰敗之令雍齒守豐齒
降魏

吳廣攻滎陽不克裨將田臧矯陳王令殺之臧與
秦戰敗死

趙將李良路遇趙王姊以爲王伏謁道旁姊醉不
加禮良怒攻邯鄲殺姊并弑趙王武臣

秦章邯兵擊陳陳勝之御莊賈弑勝以降于秦故
涓人呂臣攻殺莊賈復以陳爲楚勝謚隱王塋碭

陳勝稱王凡六月然四方之兵應勝而起秦因
以亡

張耳陳餘收散卒擊李良敗走求趙王歇立之

陳人秦嘉聞陳勝死立景駒爲楚王沛公往從之
張良聚少年百餘人欲從景駒道遇沛公遂從沛
公

項梁擊殺景駒居鄆人范增往說梁立楚後梁乃
求楚懷王孫心於民間爲人牧羊立以爲楚懷王
以陳嬰爲上柱國梁自號武信君

應劭曰六國爲秦所并楚最無罪爲百姓所思

故求其後立為楚懷王以祖謚為號順民望也
張良說項梁立韓公子橫陽君成為韓王良為徒司
英布蒲將軍以兵屬楚

英布六人少時有客相之曰當刑而王及壯坐
法黥輸驪山亡命之江中為盜聞陳勝起廼見
番君與其眾叛秦番君妻以女章邯滅陳破呂
臣軍乃引兵屬項梁

章邯擊魏齊救之秦兵殺齊王儋魏王咎自燒死
齊人復立齊王建弟假為齊王儋弟田榮逐假立
儋子田市為王而相之

秦趙尚說二世深居淫樂詒丞相入諫以激怒二
世下右丞相馮去疾左丞相李斯將軍馮劫于獄
去疾劫自殺李斯具五刑腰斬于咸陽市夷三族
章邯擊敗楚軍定陶項梁死懷王徙都彭城號項
羽魯公

楚復立魏王咎弟豹為魏王

章邯擊趙圍趙王張耳於鉅鹿陳餘不能救楚懷
王以宋義為上將軍項羽為次將范增為末將救
趙

甲午

項羽以宋義兵不進矯楚懷王令殺之大破秦軍

虜其將王離救鉅鹿圍解諸侯將入轅門膝行而前莫敢仰視趙王既出張耳責陳餘餘怒解印綬與耳耳佩之餘與數百人去河上澤中漁獵二人遂成隙

懷王以宋義能料武信君必敗遂以爲上將軍然義非上將才也項羽豈能爲之下乎

沛公擊昌邑彭越以兵助之

彭越昌邑人常漁鉅野澤中少年初相聚百餘人請越爲長越謝不願強之乃許期旦日日出會後期者斬旦日日出十餘人後至日中越謝

曰諸君彊以爲長今期而多後不可盡誅誅最後者一人皆笑曰何至是越乃引一人斬之衆大驚畏後以兵三萬歸漢以爲魏相國畧梁地從漢王入彭城

沛公使酈食其說下陳留

秋七月秦章邯降楚

八月趙高遣其壻咸陽令閻樂以兵入望夷宮數二世罪弑之二世願爲一郡王弗許願爲萬戶侯不許願爲黔首樂曰臣受命丞相誅足下足下雖多言不敢報麾其兵進二世自殺以黔首葬于苑

八代紀要 卷之六 七
中立二世兄子子嬰降稱王令子嬰廟見受璽齋
五日子嬰曰是欲因廟中殺我稱疾不行高自往
曰宗廟重事奈何不行子嬰遂刺殺高於齋宮夷
三族

乙未 冬十月沛公先入關秦王子嬰係頸以組白馬素
車奉天子璽降軹道旁沛公入咸陽除秦苛政與
父老約法三章封府庫還軍霸上

秦自非子於周孝王十三年甲子受封至始皇
已卯有國凡六百七十六年自始皇二十六年
庚辰稱皇帝至子嬰降漢凡一十五年而亡

十二月項籍兵至聞沛公已定關中大怒攻破關
屠咸陽殺秦降王子嬰掘始皇塚大掠 范增說

項籍擊沛公羽季父項伯善張良夜馳以告沛公
與伯約為婚姻解之沛公往謝會於鴻門

初懷王與諸將約先入關者王之至是項羽使人
致命懷王曰如約羽乃尊懷王為義帝不用其命
又惡負約恐諸侯叛之乃曰巴蜀亦關中地故立
沛公為漢王王巴蜀漢中都南鄭三分關中王秦
降將以距漢以章邯為雍王王咸陽以西都廢丘
司馬欣為塞王王咸陽以東都櫟陽董翳為翟王

王上郡都高奴 徙魏王豹爲西魏王王河東都
平陽 瑕丘申陽先下河南迎楚河上立爲河南
王都洛陽 趙將司馬卬定河內有功立爲殷王
王河內都朝歌 徙趙王歇爲代王趙相張耳素
賢又從入關立爲常山王王趙地都襄國 當陽
君英布爲楚將常冠軍立爲九江王都六 番君
吳芮率百越佐諸侯入關立爲衡山王都邾 義
帝柱國共敖擊南郡功多立爲臨江王都江陵
徙燕王韓廣爲遼東王都無終 燕將臧荼從楚
救趙從入關立爲燕王都薊 徙齊王田市爲膠

東王都即墨 齊將田都從共敖救趙從入關立
爲齊王都臨菑故秦所滅齊王建孫田安下濟北
數郡降項梁故立爲濟北王都博陽 韓王成因
故都都陽翟 田榮數負項梁又不將兵擊秦故
不封 成安君陳餘棄將卬去不從入關聞其賢
封南皮三縣 番君將梅鋗功多封十萬戶
項羽自立爲西楚霸王王九郡都彭城 齊相田
榮擊走田都留田市不遣市畏項羽竊亡之國榮
遂殺市時彭越有衆萬餘在鉅野無所屬榮乃授
以將卬攻殺濟北田安并有三齊自立爲齊王項

羽以韓王成無功不遣之國與俱至彭城廢爲侯
殺之張良復歸漢以爲成信侯 楚立故吳令鄭
昌爲韓王以拒漢

滅荼逐韓廣之國廣不欲去遼東荼弑廣并其地
漢以韓信爲大將還定三秦雍王章邯敗走塞王
欣翟王翳俱降

韓信淮陰布衣家貧不能治生釣於城下漂母
見其飢而飯之爲淮陰惡少所辱俛出袴下項
梁渡淮仗劍從之以策干項羽不用歸漢坐法
當斬滕公活之漢王至南鄭將士皆思歸道亡

信亦亡蕭何追還言於漢王拜爲大將

王陵以兵屬漢楚執其母招之母伏劍死

丙申 項羽詐言古之帝者地方千里必居上游徙義帝
遷都長沙郴縣密令人弑之

綱目云西楚霸王項籍弑義帝於江中分註云
使吳芮黥布共敖弑之江中史記云陰令衡山
臨江王擊殺之江中無英布前漢書則云使九
江王布殺義帝於郴史記黥布本傳云布使將
擊義帝追殺之郴縣正義云郴州有義帝塚所
載不同併附于此

陳餘以齊兵攻常山張耳敗走歸漢餘迎趙王歇
還趙自立爲代王仍傳趙

楚擊齊田榮走死立田假爲齊王齊民叛楚田橫
逐假立榮子廣 河南王申陽韓王鄭昌俱降漢
漢立韓王孫信爲韓王

韓王信者故韓襄王孽孫也初項梁立楚後燕
齊趙魏皆已前王惟韓無後張良說梁立諸公
子成爲韓王項梁敗死成奔懷王沛公下韓故
地得信以爲韓將從入武關及立爲漢王從入
漢中勸漢王東嚮爭天下漢還定三秦拜韓太

尉項羽殺韓成令其游吳時吳令鄭昌爲韓王
信擊敗昌漢乃以信爲韓王以此漢初有兩韓
信

魏王豹降漢漢虜殺王司馬卬以陳平爲護軍中
尉

陳平陽武人家貧以弊席爲門而門外多長者
車富人張負女孫五嫁而夫輒死人莫敢娶平
娶之里社宰肉甚均父老善之平曰使平得宰
天下亦如是肉矣陳涉起立魏王咎平往從之
不能用歸項羽殺王背楚羽遣平擊降之以爲

都尉賜金二十鎰漢平殷項羽怒欲誅定殷者
平懼封金與印使使還楚而間行歸漢渡河船
人見其美丈夫疑其亡將要有金玉欲殺平平
覺解衣裸而佐刺船船人乃止平至修武因魏
無知得見漢王與語說之遂拜都尉護諸將軍
又捐金四萬斤恣其出入以反間楚之君臣

漢王用新城三老董公言爲義帝發喪率五諸侯
兵討項羽漢王入彭城收寶貨美人置酒高會項
羽自以精兵擊敗漢軍士卒死者二十餘萬睢水
爲之不流殷王卬死塞王欣翟王翳俱降楚會大

風晝晦漢王與數十騎遁過沛收家室已亡路遇
子盈及魯元公主載行楚騎追急推墮下車者再
夏侯嬰下車收之得脫審食其與太公呂后間行
爲楚所執漢王至滎陽諸敗軍方會蕭何發關中
老弱未附者悉至軍復大振

丁酉 魏王豹背漢降楚韓信擊虜之以魏地爲河東太
原上黨三郡

韓信與張耳破趙於井陘口禽趙王歇斬陳餘泚
水上韓信用李左車策以書下燕信請以張耳爲
趙王 隋何說九江王英布歸漢

項羽為陳平反間君臣相疑范增去疽發背死

楚兵圍漢王於滎陽蓋急漢將紀信乘黃屋車左

纛詐為漢王降楚楚兵咸赴城東聚觀漢王與數

十騎從西門遁令御史大夫周苛與樅公魏豹守

滎陽周苛以魏豹曾反難與共守殺豹項羽燒殺

紀信執周苛不屈殺之併殺樅公漢王馳入韓信

張耳壁奪其軍遣信擊齊

漢使酈食其說下齊

戊戌

韓信以蒯徹言襲破齊齊王廣烹酈食其走高密復奔彭城

漢取成臯楚海春侯曹谷塞王欣俱自殺

漢軍與楚相拒廣武項羽置太公俎上曰今不急

下吾烹太公漢王曰吾與若約為兄弟吾翁即若

翁必欲烹而翁幸分我一杯羹羽以項伯言不殺

漢王數羽十罪為伏弩傷馳入成臯

或曰羽置太公俎上使聖賢處此當如何曰竊

負而逃遵海濱而處終身欣然樂而忘天下聖

人之心知有父而已漢高是時但知爭天下安

足以語此

楚救齊韓信擊破之斬楚將龍且虜齊王廣田橫

復自立爲王信擊走遂定齊地漢王至櫟陽梟故塞王欣首於市

韓信請爲假王以鎮齊漢王怒張良陳平附耳語遂立信爲齊王

漢以英布爲淮南王

北貉燕人致梟騎助漢

顏師古曰北貉在東北方三韓之屬丘濬世史正綱曰此中國借兵夷狄之始愚按漢是時兵力自足以滅項恐不必假北貉之兵也

漢遣陸賈說項羽請太公吕后不聽復使侯公說羽乃與漢約中分天下以鴻溝以西爲漢以東爲楚歸太公吕后

漢王欲西張良陳平以爲機不可失遂仍伐楚

已亥漢高祖皇帝五年混一天下

是年以後始大書帝

冬十月漢王追項羽至固陵韓信彭越兵失期以張良言分睢陽以北與越從陳以東傅海與信乃各以其兵至

十二月圍項羽垓下羽兵大敗走至烏江自刎以魯公禮葬于穀城封項伯等四人爲列侯賜姓劉氏

漢王即皇帝位更王后曰皇后王太子曰皇太子
追尊母爲昭靈夫人更封齊王韓信爲楚王魏相
國彭越爲梁王衡山王吳芮爲長沙王故粵王
無諸爲閩粵王遣劉賈等虜臨江王共尉尉敖
之子也召故齊王田橫於海島橫與二客至洛
陽自殺以王禮葬之二客自殺島中五百人聞橫
死亦自殺

欲都洛陽齊人婁敬求見勸都關中以敬爲郎中
賜姓劉遂定都長安張良謝病辟穀

趙王張耳卒子敖嗣尚魯元公主

燕王臧荼反帝自將平之以盧綰爲燕王

盧綰豐人與高祖同日生素親愛高祖起沛以
客從軍中爲太尉衣服飲食賞賜諸將莫及封
長安侯項羽既亡從劉賈等虜共尉至是從破
燕遂封燕王

庚子

韓信初之國人有告其反者帝用陳平計僞遊雲
夢擒之以歸赦爲淮陰侯

立從兄賈爲荆王弟交爲楚王兄喜爲代王立外
婦之子肥爲齊王

以太原郡爲韓國徙韓王信王之以備胡

尊太公為太上皇

匈奴寇邊韓王信叛

匈奴相傳為夏后氏苗裔曰淳維自後為山戎為獫狁為薰粥為畎戎為翟種類不一皆謂之胡秦使蒙恬逐之塞外秦滅復南渡河至是強盛控弦之士三十餘萬自稱單于單于者廣大之貌言其象天單于然也圍韓王信於馬邑信使使求和解漢疑信有二心讓之信恐遂以馬邑降匈奴

今博士叔孫通起朝儀召魯兩生不至

有天下者不可一日無禮秦起西戎先生之禮廢已久矣漢承秦後開國之初不可不講惜乎叔孫通不能訪求遺老講明三代之典尚襲秦之舊習耳兩生者乃謂積德百年而後可興無乃太迂乎

辛丑 帝自將討韓王信於銅鞮信敗走帝乘勝逐北至樓煩太寒士卒墮指者什二三遂至平城為匈奴所圍七日用陳平祕計得出

匈奴攻代代王喜棄國歸雒陽赦為合陽侯立戚夫人子如意為代王

蕭何治未央宮成始自櫟陽徙都長安置宗正官
以序九族

壬寅

癸卯 用劉敬言與匈奴和親帝欲遣長公主呂后不可
乃以家人子爲公主妻之

徙齊楚大族昭氏屈氏景氏懷氏田氏五姓實關
中與利田宅

廢趙王張敖爲宣平侯徙代王如意爲趙王

帝討韓王信還過趙趙王執子壻禮甚卑帝不
加禮趙相貫高趙午等耻之欲謀逆趙王不知

也事覺并逮趙王趙午等皆自剄貫高獨怒罵
曰公等皆死誰白王不反者乃轆車膠致詣長
安詔敢有隨王者夷三族郎中田叔孟舒等十
人自髡鉗爲王家奴從就獄高對吏曰吾屬爲
之王實不知榜笞刺剗身無可擊者終不復言
廷尉以聞帝曰壯士誰知者泄公曰臣素知之
乃使泄公持節以問高具道王不知狀乃赦敖
帝賢高欲赦之高曰所以不死者白王不反也
今王已出吾責已塞死不恨矣且人臣有篡弑
之名何面目復事上哉乃仰絕亢遂死帝嘉田

叔等十人召見盡拜郡守諸侯相

以蕭何爲相國

甲辰

太上皇崩葬萬年令諸侯王皆立廟

以周昌爲

趙相趙堯爲御史大夫

代相國陳豨反帝親征

乙巳

淮陰侯舍人笪上變告韓信與陳豨謀爲內應欲

與家臣詐赦諸官徒奴襲呂后太子部署已定待

報而發呂后與蕭何謀詐言豨已得死詒信入賀

縛而斬之遂夷三族

韓信峻郤蒯徹之說其心豈背漢者哉方徙王

於楚遽以人言禽之失職怏怏至與陳豨陰約

容或有之不加詳審而遽行殺戮又夷其三族

慘亦甚矣非所以待功臣也當是時蕭何亦不

言之蓋何習見秦法之慘而不以爲異也嗚呼

人謂漢大綱正帝不在而后專殺惡在其爲正

乎

陳豨敗

以代數有胡寇取山南太原地蓋代代雲中以西

爲雲中郡立子恒爲代王都晉陽

將軍柴武斬韓王信於參合

詔郡國求遺賢

八什系要 卷之六
廢梁王彭越為庶人徙蜀尋殺之夷三族醢其肉以賜諸侯

帝擊陳豨徵兵於梁越稱病使將將兵詣邯鄲帝怒讓之越恐欲自往謝其將扈輒曰往則為禽不如遂反越不聽梁太僕得罪於越亡走告之帝使使掩梁王囚至洛陽有司治反形已具請論如法赦為庶人傳處蜀逢呂后從長安來越泣訴無罪后乃與越俱至洛陽白上曰彭越壯士今徙之蜀此自遺患不如誅之乃令人告越復謀反夷三族梟首洛陽詔收視者捕之梁

大夫欒布使齊還奏事頭下祠而哭之吏捕以聞欲烹之布曰方上之困彭城敗滎陽也王與楚則漢破與漢則楚破垓下之會徵彭越項氏不亡天下已定以苛小按誅滅之恐功臣人人自危也今彭王已死布生不如死請就烹帝釋之拜為都尉

立子恢為梁王 子友為淮陽王

立秦南海尉趙佗為南粵王

初秦南海尉任囂病且死召龍川令趙佗語曰秦無道天下苦之聞陳勝等作亂未知所安番

禹負山險阻南海數千里可以立國囂死佗即
移檄絕道聚兵誅秦吏并桂林象郡自立爲南
越武王至是遣陸賈立爲南粵王佗留賈與飲
數月賜橐中裝直千金歸報帝悅拜賈大中
大夫

淮南王英布因見韓信彭越相繼誅死遂發兵反
擊荆王劉賈走死復擊楚帝復自將討之

丙午 英布敗走長沙王臣誘殺之

帝還過沛召故人父老酣飲歌大風歌

過魯以大牢祠孔子

大尉周勃斬陳豨定代地

以荆爲吳立喜之子濞爲吳王

帝欲易太子群臣諫不聽張良招四老人輔太子
遂不易

蕭何以長安地陜請民田上林空地帝大怒下獄
數日以王衛尉言釋之

燕王盧綰恐懼謀反遣樊噲將兵擊之 立子建
爲燕王

帝擊英布時爲流矢所中至是疾甚呂后迎醫帝
不用人有言樊噲黨呂氏晏駕後必殺趙王帝怒

詔周勃代噲將陳平即軍中斬噲首二人以噲功多且呂頹夫也恐後悔檻車載詣長安

夏四月帝崩在位十二年壽五十三呂后與審食其謀欲盡族諸將祕不發喪酈商聞之往見食其曰帝已崩四日不發喪欲誅諸將誠如此天下危矣食其入言乃發喪葬長陵

盧縮欲俟帝疾愈入謝罪聞帝崩亡入匈奴太子盈即位年十七群臣以高祖起細微撥亂反正平定天下為漢太祖功最高尊為高皇帝令郡國諸侯各立高祖廟後五年於沛立原廟高帝八

男庶長齊悼惠王肥次孝惠帝呂后子次趙隱王如意戚夫人子次代王恒是為孝文帝薄太后子次梁王恢呂后徙為趙共王次淮陽王友呂后徙為趙幽王次淮南厲王長次燕王建尊皇后為太后赦樊噲

丁未漢孝惠帝元年

冬十二月太后殺趙王如意斷戚夫人手足為人彘徙淮陽王友為趙王

呂后令戚夫人髡鉗赭衣舂于永巷召趙王三反周昌不遣乃先召昌復召趙王至帝知太后

意與俱興居飲食欲殺之不得間帝晨出射趙
王未起使人酖殺之遂斷戚夫人手足去眼燿
耳飲瘖藥居側中命曰人彘請帝觀之帝驚哭
成疾不視事

戊申 冬十月齊王肥來朝帝以其兄如家人禮置上坐
太后怒以酖酒賜齊王使為壽帝亦起取卮俱為
壽太后恐自起泛帝卮齊王佯醉出用內史勲計
獻城陽一郡為魯元公主為湯沐邑尊公主為王
太后太后喜乃得歸齊

鄜侯蕭何卒以曹參為相國

鄜才何切沛國縣名蕭何受封于鄜唐詩麒麟
閣識鄜侯作鄮非

巳酉 匈奴上書襲嫚欲擊之復和親

立閩越君搖為東海王即東甌

庚戌 冬十月立魯元公主女張氏為后 除挾書律
舉孝弟力田者

辛亥 平陽侯曹參卒

壬子 冬十月以王陵為右丞相陳平為左丞相周勃為
太尉 留侯張良卒謚文成 舞陽侯樊噲卒

癸丑 秋七月帝崩在位七年壽二十四太后泣不下張

良子辟疆謂丞相曰太后獨一子不悲畏君等也
請拜呂台產祿爲將居南北軍以安其心君等免
禍矣丞相如辟疆計太后哭廼哀

九月葬帝安陵太后以張后所養他人子立爲帝
自己稱制

甲寅

高皇后稱制元年

以王陵爲帝太傅陳平爲右丞相審食其爲左丞
相任敖爲御史大夫審食其不治事監宮中如郎
中令 追尊太后父呂公爲宣王兄澤爲悼武王
魯元公主卒謚魯元太后

封齊悼惠子章爲朱虛侯以呂祿女妻之

以孝惠後宮子彊爲淮陽王子不疑爲常山王子
山爲襄城侯子朝爲軹侯子武爲壺關侯又風大
臣請立酈侯呂台爲呂王割齊之濟南爲呂國

太后欲王諸呂王陵曰高帝刑白馬盟曰非劉
氏而王天下共擊之陳平周勃曰高帝定天下
王子弟太后稱制王諸呂無所不可陵讓平勃
平勃曰面折廷爭臣不如君全社稷定劉氏君
不如臣於是太后遂王諸呂以王陵爲帝太傅
實奪其權陵遂免

是年桃李秋華

乙卯

吕台卒謚肅王以子嘉嗣

恒山王不疑卒以襄城侯山爲恒山王更名義
是年武都山崩

丙辰

夏江漢水溢 秋伊洛汝水溢 星晝見

丁巳

夏四月太后封女弟頌爲臨光侯即樊噲妻

五月太后廢少帝幽殺之立恒山王義爲帝更名
弘不稱元年

孝惠后張氏取吕氏美人有身者入宮生子而殺其
母孝惠崩立爲帝知非其子出言曰后殺吾母壯即

爲變太后患之乃幽之求莽詭言病甚

以軹侯朝爲常山王 置太尉官以周勃爲太尉

戊午

淮陽王疆卒太后立武爲淮陽王

己未

太后廢吕王嘉立台弟產爲吕王

庚申

太后召趙王友餓死以民禮葬之徙梁王恢爲趙

王以吕王產爲梁王更名梁曰吕吕曰濟川

太后以諸吕女爲趙王后趙王弗愛愛他姬吕

女妬讒於太后曰趙王云吕氏安得王百歲後

吾必擊之太后召王至邸不見令衛圍守之弗

與食趙王餓歌曰諸吕用事兮劉氏危迫脅王

侯兮強授我妃妃既妬兮誣我以惡讒女亂國
兮上曾不悟我無忠臣兮何故棄國自決中野
兮蒼天舉直誰者憐之呂氏絕理兮託天報仇
竟幽死

呂頹女嫁營陵侯劉澤以澤為琅邪王

梁王恢徙王趙心懷不樂太后以呂產女為王后
王有愛姬后醜殺王悲憤自殺太后以王用婦人
棄宗廟廢其嗣徙代王恒為趙王代王願守代太
后乃以呂祿為趙王

宣平侯張敖卒賜謚魯元王以敖子偃為魯王

燕王建卒太后使人殺其子國除

辛酉 以呂肅王子東平侯呂通為燕王通弟呂莊為東
平侯

春三月太后被還過軹道見物如蒼犬據掖忽不
見卜云趙王如意為祟遂病掖傷

秋七月太后病甚令呂祿為上將軍軍北軍呂產
居南軍誡之曰我即崩帝年少恐大臣為變必據
兵衛慎勿送喪母為人所制遂崩遺命以呂祿女
為帝后呂產為相國審食其為帝太傅
朱虛侯劉章知諸呂欲為亂陰告其兄齊王襄起

兵遺書諸侯王陳諸呂罪以討不當王者相國呂
產遣大將軍灌嬰帥兵擊之灌嬰至滎陽謀曰諸
呂危劉氏若破齊是益其資也與齊連和以待變
酈商子寄與呂祿善周勃陳平使寄詒說呂祿解
將印歸國以解齊兵祿信之遂以兵屬勃與丞相
平朱虛侯章誅產祿及諸呂杖殺呂頹廢魯王張
偃遣告齊王與灌嬰俱罷兵

酈寄說呂祿曰高帝與呂后定天下劉氏立九
王呂氏立三王皆大臣之議布告諸侯皆以為
宜今太后崩帝少而足下佩趙王印不急之國

守藩廼爲上將將兵留此爲大臣諸侯所疑何
不歸將印以兵屬太尉請梁王歸相國印與大
臣盟而之國則齊兵必罷大臣得安足下高枕
而王千里萬世之利也祿信其計其姑呂頹怒
曰爲將而棄兵呂氏今無處矣悉出珠玉寶器
散堂下曰毋爲他人守也人以酈寄爲賣友夫
大義滅親豈顧友乎

後九月諸大臣議迎高祖仲子代王恒即位年二
十三是爲孝文帝誅僞子弘及僞諸王

人代紀要卷之六

人代紀要卷之七

明吳興顧應祥編集

大埔黃宸校刊 江陰湯明善

庠生倪佩同校

壬戌漢孝文皇帝元年

徙琅邪王澤為燕王封趙幽王子遂為趙王

以陳平為左丞相周勃為右丞相灌嬰為大尉

除收孥相坐律令

立子啓為皇太子 竇氏為皇后

封宋昌為壯武侯

帝問每歲決獄錢穀出入之數周勃不能對或說
周勃誅諸呂迎代王功高賞重禍且及身勃乃謝
病免陳平專為相

遣太中大夫陸賈使南越越王佗稱臣奉貢

河南守吳公治平為天下第一召為廷尉吳公薦
洛陽賈誼召為博士超遷至太中大夫誼請改正
朔易服色興禮樂以立漢制帝謙讓未遑

癸亥

曲逆侯陳平卒謚曰獻復以周勃為丞相

詔列侯之國

舉賢良方正直言極諫者

親耕籍田 除誹謗妖言法

賜民田租之半

立趙幽王次子辟疆為河間王朱虛侯章為城陽

王東牟侯興居為濟北王

立皇子武為代王叅為太原王揖為梁王

甲子

冬十一月帝以列侯之國者未即行詔丞相率列

侯之國周勃免以灌嬰為丞相罷太尉官

淮南王長來朝殺審食其

初趙王張敖獻美人於高祖已有娠以貫高事

坐繫美人弟因審食其言于呂后后妬弗為白

美人已生子即自殺吏奉其子以白高帝悔封
為淮南王及壯以母不得其死怨食其文帝即
位來朝以鐵椎殺食其肉袒謝罪帝傷其為
親故弗治以此歸國益驕恣

匈奴入寇丞相灌嬰將兵擊走之

濟北王興居反將軍柴武擊敗自殺

初誅諸呂朱虛侯功尤大大臣許以趙王章梁
王興居帝聞其初欲立齊王故絀其功割齊二
郡以王之興居怏怏聞帝如太原以為天子自
擊胡遂反按文帝以劉章欲立齊王懷憤而絀

其功則夫即位之讓得非虛讓乎

以張釋之為廷尉

乙丑

灌嬰卒以張蒼為丞相

以賈誼為長沙王太傅

周勃下獄數日而釋

周勃既就國每河東守尉行縣至絳勃恐誅常
被甲令家人持兵見之人告勃反下廷尉逮治
勃恐不知置辭吏稍侵辱之以千金與吏吏乃
書牘背示之曰以公主為證勃太子尚帝女故
也薄太后亦曰絳侯始誅諸呂縮皇帝璽居北

軍不以此時反今居一小縣乃反耶帝見勃獄
辭乃赦之復爵邑勃既出曰吾嘗將百萬軍安
知獄吏之貴乎夫周勃身居將相而不能對獄
吏漢初人才質朴如此亦可見濟天下之大事
者不在言語之間也

作顧成廟

此文帝生而自為廟者也賈誼謂使顧成之廟
稱為太宗正謂此

丙寅 徙代王武為淮陽王

丁卯 淮南王長謀反召至長安赦死廢勿王載以輜車

徙處蜀郡傳至雍縣道死帝哭之哀逮考諸縣傳
送不發封餽侍者皆棄市以列侯禮葬于雍謚曰

厲

淮南謀反事已敗露丞相御史宗正廷尉曰罪
當棄市法也帝曰宥之情也死于道路乃帝欲
苦之耳雖諸縣傳送者亦不當死袁盎乃謂斬
丞相御史大夫以謝天下母乃過乎

匈奴單于冒頓死子稽粥立號老上單于復請和
親以宗室女為單于閼支使宦者燕人中行說傳
之中行說教單于為漢患

賈誼為梁王傳上治安策

戊辰

巳巳 以淮南厲王子四人為列侯賈誼諫不聽

庚午

辛未 太后弟薄昭殺漢使帝使群臣喪服往哭逼令自

殺 太常掌固鼂錯往濟南受書于伏勝

壬申 梁王揖卒以賈誼言徙淮陽王武為梁王

匈奴寇狄道 鼂錯言兵事 募民實塞下

令宮人出嫁

癸酉 河決酸棗

用鼂錯言入粟於邊拜爵免罪

按入粟拜爵即錫民爵一級之爵正欲使民咸務農而實邊與後世入粟拜官與之治民者不

同

賜農民今年半租

遣謁者賜三老孝弟廉吏帛

甲戌 感女子緹縈言除肉刑 賈誼卒 除田租稅

乙亥 匈奴入寇遣兵擊之出塞而還

用馮唐言復以魏尚為雲中守

增諸祀壇場珪幣令祠官無有所祈

丙子 黃龍見成紀

始親策賢良文學之士以鼂錯對策高第擢中大夫 帝如雍郊五帝 作渭陽五帝廟

丁丑 分齊地立悼惠王子將閭為齊王志為濟北王賢為菑川王雄渠為膠東王卬為膠西王辟光為濟南王

分淮南地立厲王子安為淮南王勃為衡山王賜為廬江王

帝如渭陽祠五帝以新垣平為上大夫賜千金使博士諸生刺六經中作王制謀議巡狩封禪事

秋九月新垣平詐使人獻玉杯又言日再中改十七年為元年令天下大酺作汾陰廟祈周鼎出

漢文於賈誼言改正朔興禮樂則謙讓未遑新垣平言祠五帝議封禪則為之建露臺則惜百金之費賜方士則累千金邪道之易於惑人如此

戊寅後元年 新垣平事敗伏誅夷三族 長安狗生角
○詔議可以佐百姓者

巳卯 張蒼免以申屠嘉為丞相時大中大夫鄧通方愛幸賞賜鉅萬帝嘗燕飲其家嘉奏事通於帝前怠慢嘉召通欲斬之帝使人持節召通謝丞相方解

庚辰 匈奴老上單于死子軍臣單于立

辛巳

壬午

癸未 匈奴寇上郡雲中詔將軍周亞夫等屯兵備之

甲申 夏六月帝崩在位二十三年壽四十六謚孝文皇

帝遺詔不許厚葬令吏民臨三日毋禁嫁娶祠祀

當給喪事服臨者無跣經帶毋過三寸毋布車及

兵器哭臨旦夕十五舉聲服大紅十五日小紅十

四日織七日 後世人君崩服二十七日蓋本諸

太子啓即位尊太后曰太皇太后皇后曰皇太后

是年長沙王著卒無嗣國除

乙酉漢孝景皇帝元年

冬十月尊高皇帝為太祖孝文皇帝為太宗令郡

國立太宗廟 葬文帝灞陵

帝王廟號始此

復收民田半租三十而稅一 減筭法

丙戌 令男子二十始傅

立子德為河間王闕為臨江王餘為淮陽王非為

汝南王彭祖為廣川王發為長沙王

夏四月太皇太后薄氏崩

內史鼂錯用事寵幸法令多所更定申屠嘉疾之
奏錯穿太廟垣垣出入請斬錯帝不聽嘉歐血死

以陶青為丞相鼂錯為御史大夫

是年熒惑逆行守北辰 月出北辰間 歲星逆

行天廷中

丁亥 吳王濞約膠西王卬膠東王雄渠菑川王賢濟南

王辟光楚王戊趙王遂謀反以誅鼂錯為名遣太

尉周亞夫大將軍竇嬰討之

以袁盎言腰斬鼂錯以謝七國父母妻子同產無

少長皆棄市

初鼂錯父謂錯曰上初即位公用事侵削諸侯

疏人骨肉口語多怨公何也錯曰不如此天子

不尊宗廟不安父曰劉氏安鼂氏危矣遂仰藥

死曰吾不忍見禍後十餘日七國反錯之為謀

無非為漢也腰斬於市又及同產無少長皆誅

之漢之法何其酷哉

周亞夫破吳楚軍濞亡走越戊自殺

越人斬濞齊王將閭及卬遂皆自殺雄渠賢辟光

俱伏誅

封竇嬰為魏其侯立楚元王子平陸侯禮為楚王

皇子端為膠西王勝為中山王

徙濟北王志為菑川王淮陽王餘為魯王汝南王

非為江都王

戊子 以皇子榮為皇太子徹為膠東王

徙衡山王勃為濟北王廬江王賜為衡山王

巳丑 以公主嫁單于 徙廣川王彭祖為趙王

庚寅 廢皇后薄氏

辛卯 冬十一月廢太子榮為臨江王

陶青免以周亞夫為丞相罷太尉官

夏四月立王夫人為皇后膠東王徹為皇太子

初燕王臧荼孫女臧兒適槐里王仲生男信及

兩女仲死臧兒更嫁長陵田氏生蚡其長女為

金王孫婦生女俗臧兒卜兩女皆當貴乃奪金

氏婦內之太子宮是為王夫人生徹時長公主

嫖欲以女嫁太子太子之母栗姬不許長公主

乃以女予徹王夫人許之長公主日讒栗姬而

譽王夫人夫人陰使大行請立栗姬為皇后帝

怒誅大行遂廢榮而立徹

以郅都為中尉嚴酷不避列侯宗室側目而視號

曰蒼鷹

人代紀要 卷之七
壬辰中元年

癸巳 臨江王榮坐侵太宗廟墻垣為宮徵下中尉獄自
殺太后因是惡郅都中以危法斬之

梁王武以至親有破吳楚功賜天子旌旗出蹕入
警寵信羊勝公孫詭陰謀漢嗣栗太子廢太后愛
梁王欲以為嗣袁盎等不可梁王乃與勝詭謀遣
人刺殺盎帝遣田叔往按之勝詭自殺田叔焚獄
辭以梁王不知免太后始喜帝以田叔為魯相
是年改磔為棄市

甲午 周亞夫免 劉舍為丞相

乙未

丙申 更諸侯丞相曰相

丁酉 梁孝王武來朝乞留不許王不樂四月卒太后哭
不食曰帝殺吾子帝乃以梁地為五王其子五人
買為梁王明為濟川王彭離為濟東王定為山陽
王不識為濟陰王女五人皆食湯沐邑太后始悅
加餐

是年改奉常為太常改廷尉為大理

太常在唐虞為秩宗兼典禮樂周曰宗伯秦改
奉常至是始更為太常太常者王者旌旗也王

有大事則建以行太者尊稱如太僕之類
以寧成為中尉治效都而庶不及

戊戌後元年

劉舍免以衛綰為丞相直不疑為御史大夫

下條侯周亞夫於獄不食死

帝召亞夫賜食置大裁無切肉又不置箸亞夫
心不平顧尚席取箸帝笑曰此非不足君所乎
亞夫免冠謝出帝曰此鞅鞅非少主臣也居無
何其子買尚方甲楯為葬器事覺為人所告下
吏吏薄責亞夫亞夫不對帝怒召詣廷尉不食

五日嘔血而死

巳亥

庚子 勸農棄禁采黃金珠玉

春正月帝崩在位十六年壽四十六謚孝景皇帝
葬陽陵太子徹即位年一十六尊皇太后為太皇
太后皇后為皇太后

辛丑漢世宗孝武皇帝建元元年年號始於此

冬十月舉賢良方正直言極諫之士以董仲舒為

江都相

衛綰免以竇嬰為丞相田蚡為太尉趙綰為御史

大夫王臧為郎中令迎申公為太中大夫

壬寅 太皇太后好黃老不悅儒術趙綰王臧下吏自殺

竇嬰田蚡免申公免歸以石建為郎中令石慶為

內史

以許昌為丞相衛青為御史大夫

衛青平陽人其父鄭季以縣吏給事平陽侯曹

壽家與其僮衛媼通生青冒衛姓平陽侯尚陽

信長公主武帝姊也衛媼少女衛子夫善謳帝

過主家見而悅之遂納宮中是為衛夫人

癸卯 始微行 起上林苑

甲辰

乙巳 置五經博士

丙午 五月太皇太后竇氏崩 許昌免

以太后異父弟田蚡為丞相驕侈受賂權移人主

閩越王擊南越遣大行王恢等將兵擊之閩越弟

餘善殺其王郢以降立餘善為東越王南越遣子

嬰齊入宿衛

以汲黯為主爵都尉

匈奴請和親王恢以匈奴倍約不如興兵擊之御

史大夫韓安國主和許之

丁未元光元年

以長星見改元 以董仲舒言令郡國舉孝廉

戊申 用李少君言祠竈遣方士求神仙立太乙祠

王恢誘匈奴入塞擊之不獲下吏自殺

巳酉 河徙頓丘復決濮陽瓠子注鉅野通淮泗

庚戌 冬十二月穎陰侯灌夫因醉忤田蚡魏其侯竇嬰

救之太后怒族灌夫家竇嬰棄市

春三月田蚡卒以平棘侯薛澤為丞相

辛亥 河間王德來朝獻雅樂

以唐蒙言通夜郎牂柯遣司馬相如諭巴蜀始通

西南夷 廢皇后陳氏

女巫楚服教后祠祭厭勝事覺御史張湯窮治

相連誅者三百餘人楚服梟首后廢居長門宮

供奉如故

以公孫弘為博士 張湯定律令

壬子 始筭商車後世關市之征始此 穿渭渠

癸丑 元朔元年 師古曰朔猶始言更為初始也

皇子據生立夫人衛氏為皇后

東夷歲君降置蒼海郡

主父偃嚴安徐樂上書即召見以為郎中

甲寅 以主父偃言詔諸侯王分國邑封子弟為列侯
始立朔方郡 徙郡國豪傑於茂陵族郭解
燕王定國有罪自殺主父偃為齊相按齊王罪王
懼自殺帝怒誅主父偃夷其族

初主父偃上書帝曰公等安在何相見之晚也
一歲中四遷為中大夫大臣畏其口遺累千金
或謂偃曰太橫矣偃曰吾生不五鼎食死即五
鼎烹耳偃死乃自取累及宗族惜哉

乙卯 王太后崩 張湯為廷尉

丙辰

丁巳 薛澤免公孫弘為丞相封平津侯

戊午

己未 元狩元年

冬十月祠五時獲一角獸改元

淮南王安衡山王賜謀反自殺

夏四月立子據為皇太子

是年張騫通西域 始通滇國

庚申 公孫弘卒以李蔡為丞相張湯為御史大夫

霍去病擊匈奴過焉支至祁連山而還

匈奴渾邪王降置五屬國以處其衆

辛酉 作昆明池 得渥洼神馬

壬戌 造皮幣白金鑄三銖錢置鹽鐵官美緡錢舟車洛

陽賈人子乘弘羊年十三善言利始進用

卜式輸財助邊賜爵左庶長

衛青霍去病擊匈奴李廣為部將失道自殺去病
擊敗單于封狼居胥山而還詔以青去病俱為大

司馬

以義縱為右內史王溫舒為中尉二人俱酷吏

方士文成將軍少翁誣妄事覺伏誅

癸亥 李蔡有罪自殺 以莊青翟為丞相

汲黯為淮陽太守 帝如甘泉祠神君

甲子 殺內史義縱

立子閔為齊王旦為燕王胥為廣陵王

霍去病卒 大司農顏異以腹誹論死殺之

乙丑元鼎元年 六月得寶鼎改元

丙寅 張湯有罪自殺莊青翟下獄自殺

初御史中丞李文與湯有隙湯所厚吏魯謁居

告文奸事湯論文死殺之謁居病湯親為摩足

趙王告湯大臣與吏摩足疑為大姦事下廷尉

謁居已死其弟告湯與謁居共謀共變告李文

事下減宣窮究未奏會盜孝文園瘞錢湯欲文致丞相見知丞相長史朱買臣王朝邊通素怨湯乃與丞相謀捕賈人田信等居物致富與湯交通減宣亦奏謁居事帝遣趙禹切責湯乃為書謝曰陷臣者三長史也遂自殺湯死家產不過五百金載以牛車有棺無槨帝聞之誅三長史青翟下獄自殺

起栢梁臺作承露盤以趙周為丞相

始製酒泉武威郡

丁卯 匈奴伊穉斜單于死子烏雅單于立

徙函谷關於新安

戊辰 立后土祠于汾陰得大鼎

以方士樂大為五利將軍尚公主

以方士公孫卿為郎中

巳巳 列侯酎金輕奪爵者百六人以丞相趙周見知下

獄自殺以石慶為丞相

樂大坐誣罔腰斬

庚午 平南越置南海蒼梧鬱林合浦交趾九真日南珠

厓儋耳九郡

平西南夷置牂柯越雋沈黎文山武都五郡

如緱氏觀大人跡 擊東越 置張掖敦煌郡

以下式為御史大夫 自制封禪儀

辛未元封元年 始封太山改元

冬十月出長城登單于臺

東越王餘善降徙其民於江淮間

春如緱氏祭中嶽遂東巡海上求神仙夏四月封

泰山禪肅然復東北至碣石而還

壬申 以公孫卿言如東萊欲求仙人不見 還至瓠子

臨決河命從臣皆負薪塞河作瓠子歌

作蜚廉桂觀通天莖臺 以公王蒂言作明堂于

汶上

將軍郭昌擊滇滇王降以為益州郡賜王印復長

其民

以杜周為廷尉 是年伐朝鮮

癸酉 朝鮮降始置樂浪臨屯玄菟真番郡

甲戌 南巡江漢祀舜于九疑 過尋陽射蛟江中獲之

乙亥 初置刺史冀幽并兗徐青揚荆豫益凉及朔方交

趾凡十三部 大司馬衛青卒

丙子 幸回中作首山宮 以宗室女為公主嫁烏孫

以是年十一月朔冬至為曆元改從夏正

按武帝此舉為萬世不易之法

丁丑太初元年

登泰山遣方士入海求神仙 作建章宮

夏五月行太初曆始以寅月為歲首

遣公孫敖於塞外築受降城 始置京兆尹

遣李廣利將兵伐宛求善馬

中尉王溫舒有罪自殺夷三族

戊寅 石慶卒 以公孫賀為丞相涕泣而辭不聽

趙破奴擊匈奴二萬騎俱沒

巳卯 東巡海上

庚辰 李廣利破宛獲其主及善馬封海西侯

起明光宮

辛巳天漢元年 以旱改元

遣中郎將蘇武使匈奴

壬午 李陵征匈奴力屈而降 司馬遷救李陵被腐刑

遣繡衣直指使捕東方盜賊

癸未 初榷酒酤

甲申 立子髡為昌邑王是為哀王

李廣利等伐匈奴不利夷李陵族

令死罪入贖錢五十萬減死一等

乙酉太始元年 應劭曰言蕩滌天下與民更始

匈奴且鞮侯單于死子狐鹿姑單于立

丙戌 穿白渠

丁亥 東巡琅邪浮海而還 皇子弗陵生

以江充為水衡都尉

戊子

己丑征和元年 應劭曰言征伐四夷而天下和平

帝居建章宮見一男子帶劍入命收之弗獲斬門

候發三輔騎士大索長安十日 巫蠱事起

庚寅 丞相公孫賀下獄死夷其族以劉屈氂為丞相

公孫賀初拜相涕泣而辭不獲竟遭族滅真可

哀已賀子敬聲驕奢擅用北軍錢罪不至族止

因朱安世告訐父子皆死獄中又族其家何其

慘哉

帝書寢夢木人數千持杖欲擊以江充為使治巫

蠱獄坐死者前後數萬人江充言宮中有蠱氣又

素為太子所惡遂言太子宮中掘木人尤多太子

懼無以自明發兵誅充反詔丞相劉屈氂討之太

子敗走與皇后衛氏俱自殺

李廣利與劉屈氂謀立昌邑王為太子事覺屈氂

腰斬于市收廣利妻子廣利聞之遂降匈奴族其家

高寢即田千秋為太子據訟寃以千秋為大鴻臚族滅江充家

辛卯

壬辰

帝如東萊還以田千秋言罷方士候神人者

以田千秋為丞相封富民侯下詔陳既往之悔

癸巳後元年

賜鈎弋夫人趙氏死

甲午

春二月立子弗陵為皇太子以霍光為大司馬大

將軍金日磾為車騎將軍上官桀為左將軍受遺

詔輔太子

是年帝崩于五柞宮在位五十四年壽七十一葬

茂陵謚孝武皇帝廟號世宗

太子弗陵即位年八歲是為昭帝姊鄂邑公主共

養省中霍光金日磾上官桀共領尚書事

追尊母趙氏為皇太后起雲陵

乙未漢孝昭皇帝始元元年

燕王旦謀反赦弗治誅其黨與

以雋不疑為京兆尹金日磾卒

丙申封霍光傳陸侯

匈奴狐鹿姑單于死子壺衍鞬單于立

丁酉 祠鳳凰于東海

戊戌 立上官安女倢伃為皇后以安為車騎將軍

己亥 男子成方遂詐稱衛太子赴闕雋不疑叱縛之伏誅

庚子 蘇武還自匈奴以為典屬國

辛丑元鳳元年 秋八月改

鄂邑長公主上官桀安乘弘羊丁外人等謀殺霍光廢帝立燕王旦事覺桀安弘羊丁外人等并宗族悉誅之公主燕王自殺

按戾太子死燕刺王自以為以次當立上書求入宿衛武帝怒斬其來使既立少子又不布告天下明言其所以不堪承宗廟之故武帝失之矣

以韓延壽為諫大夫張安世為右將軍杜延年為太僕

壬寅

癸卯 是年泰山石立上林僵柳復生

少府徐仁自殺腰斬廷尉王平

按乘弘羊與燕蓋之謀其子遷匿故吏侯吳家

捕得伏法後吳會赦自出繫獄廷尉王平與少府徐仁雜治欲以赦令除吳罪亦無大過霍光因怒丞相田千秋擅召二千石遂下二人於吏以致仁自殺平腰斬其專恣亦甚矣夫徐仁乃千秋之壻史稱是時政權一決於光丞相千秋謹厚自守而已向使千秋與光相競豈能免於禍哉

甲辰 帝冠 田千秋卒以王訢為丞相

傳介子以金帛誘樓蘭王刺殺立其弟在漢者尉屠耆為王更其國名鄯善賜以宮女為夫人備車

騎輜重遣之封介子義陽侯

乙巳 丞相王訢卒

丙午 楊敞為丞相

丁未元平元年

春二月帝崩在位十二年壽二十二謚孝昭葬平陵

霍光迎昌邑哀王子賀入六月即位淫戲無度霍光與張安世田延年謀奏太后廢歸昌邑國除殺昌邑從官二百餘人

秋七月霍光以丙吉言迎戾太子之孫史皇孫之

子病已即位年十七是為宣帝侍御史嚴延年劾
奏霍光擅廢立無人臣禮

衛太子納史良姊生史皇孫皇孫納王夫人生
病已為皇曾孫生數月遭巫蠱事太子男女皆
被害曾孫收繫郡邸獄丙吉為廷尉監治獄擇
謹厚女徒胡組郭微卿乳養望氣者言長安獄
中有天子氣武帝遣使詔獄中繫者無輕重一
切殺之丙吉閉門不納曰他人無辜死尚不可
况親曾孫乎使者以聞帝亦寤曰天使之也及
赦丙吉付史良姊母家收養後詔掖庭養視掖

庭令張賀奉養甚謹欲以女孫妻之賀弟張安
世不欲賀乃聘齊夫許廣漢女為配曾孫遂依
廣漢兄弟及史氏受詩於東海濱中翁好學喜
遊俠上下諸陵周徧三輔具知閭里姦邪吏治
得失至是丙吉奏記霍光迎以即位

丞相楊敞卒以蔡義為丞相

史稱蔡義以明經給事大將軍幕府至是拜相
年八十餘貌似老嫗夫宰相百僚之長國之治
亂所係霍光不為擇賢而但取其可制者無非
欲專權耳

冬十一月立許廣漢女許氏為皇后

宣帝微時許廣漢以女妻之及登大寶則許氏
自當為后夫復何疑當時公卿乃心擬霍將軍
女因帝詔求微時故劍大臣知情方白立許后
何其謬耶

人代紀要卷之七終

人代紀要卷之八

明吳興顧應祥編集

大埔黃宸校刊江陰湯明善

庠生倪佩同校

戊申漢孝宣皇帝本始元年

以定策功增霍光張安世等封邑霍光請歸政不
受諸事皆先白光然後奏御

追謚戾太子戾夫人悼考悼后置園邑

以河南丞黃霸持法平召為廷尉正

巳酉大司農田延年有罪自殺

尊孝武皇帝廟號世宗

庚戌 霍光妻顯使女醫淳于衍毒弑皇后許氏

蔡義卒韋賢為相魏相為御史大夫

辛亥 立霍光女成君為皇后

史稱霍光出入禁闥二十餘年小心謹慎未嘗有過及威權日盛遂致妻毒弑皇后光既知之乃溺於房室之愛不忍發舉又立其女為后忠謹者固如是乎金日磾與光並稱篤慎日磾子與宮人戲遂自殺之武帝嘗欲納其女後宮不肯則日磾與光優劣見矣

壬子地節元年 以先者地震山崩故改地節

以于定國為廷尉

癸丑 霍光卒謚宣成賜葬具如乘輿制以霍禹為右將

軍張安世為大司馬

匈奴壺衍鞬單于死弟虛閭權渠單于立

甲寅 立子奭為皇太子

霍顯教其女毒殺太子保阿先嘗之不得行

韋賢致仕 魏相為丞相封高平侯丙吉為御史

大夫 膠東相王成偽增戶口爵關內侯

張安世為衛將軍 霍禹為大司馬

廷尉史路溫舒請寬刑 初置廷尉平

乙卯 霍禹山雲謀反族誅霍后廢

以朱邑為大司農 龔遂為水衡都尉

霍光擁昭立宣其功固偉然亦臣子之分所當為至其威權日盛子孫驕侈而不知訓戒身沒之後朝廷稍加裁抑即相對泣潛起異謀滅亡之禍乃其自取謂宣帝醞釀以成之非也

丙辰元康元年

追尊悼考為皇考立寢廟 以尹翁歸治郡廉平

召為右扶風 殺六兆尹趙廣漢

趙廣漢見事風生無所回避以私怨論殺男子榮畜人上書言之下丞相御史按驗廣漢疑丞相夫人殺侍婢欲以脅丞相乃將吏卒入相府召其夫人跪庭下受辭收奴婢十餘人去丞相上書自陳事下廷尉治不如廣漢言帝惡之下廣漢獄吏民守闕號泣者數萬人竟坐腰斬廣漢庶明威制豪強小民得職百姓追思

衛候馮奉世使西域適莎車叛奉世矯制發諸國兵擊之莎車王自殺傳首長安帝欲封奉世蕭望之不可以為光祿大夫

丁巳 春二月立使仔王氏為皇后令母養太子

帝更名詢 以蕭望之為左馮翊

戊午 封昌邑王賀為海昏侯 立子欽為淮陽王

錄阿保功封丙吉史魯許舜張賀子彭祖為列侯

疏廣疏受謝歸 黃霸為京兆尹尋還故官

己未 張安世卒

庚申神爵元年

春正月如甘泉始郊泰畤

以嘉穀玄稷降于郡國神爵仍集金芝產于銅池

九真獻奇獸南郡獲白鹿改元神爵

遣諫議大夫王褒求金馬碧鷄之神

諫大夫王吉以言不用謝病歸

趙充國擊先零叛羗屯田湟中

辛酉 春二月鳳凰甘露降集京師赦

置金城屬國以處降羗

司隸校尉蓋寬饒上書切直帝以為怨謗下其書

執金吾議以為意欲求禪大不道諫大夫鄭昌上

書論救竟下吏寬饒引佩刀自剄闕下眾庶憐之

論者謂漢宣殺趙蓋韓楊皆以為過以愚觀之

寬饒尤為無罪因其書中有五帝官天下三王

家天下家以傳子孫官以傳賢聖之語執金吾
希旨遂指以為求禪大逆不道不亦寃哉

世史正綱於是年書以宦者弘恭為中書令石
顯為僕射亦以寬饒書中有以刑餘為周召以
法律為詩書故也恭顯雖宣帝時已寵用不知
起於何年故略之

壬戌

魏相卒以丙吉為相封博陽侯

蕭望之為御史大夫以韓延壽為左馮翊

癸亥

潁川太守黃霸政事愈治時鳳凰神爵數集而潁
川尤多賜爵關內侯黃金百斤秩中二千石

河內太守嚴延年有罪坐不道棄市

嚴延年陰鷲酷烈冬月論囚流血數里河南號
曰屠伯其母自東海來適見報囚止都亭不入
責延年曰爾幸得備郡守專治千里不聞教化
而多刑殺立威我不意老見壯子被刑戮也遂
去人皆賢其母

甲子五鳳元年以鳳凰五至改元

匈奴亂五單于爭立

殺左馮翊韓延壽

韓延壽代蕭望之為左馮翊望之聞延壽在東

郡時放散官錢千餘萬使御史按之延壽亦案
檢望之在馮翊時廩犧官錢百餘萬望之奏職
在總領聞事不敢不問而為延壽所拘持帝不
直延壽令窮究望之卒無事實而望之遣御史
按延壽得其試騎士日車服侍衛奢僭逾制數
事坐不道棄市百姓莫不流涕按趙廣漢與韓
延壽皆訐丞相之過然廣漢之訐過在廣漢延
壽之事則望之開其端也顏師古曰望之以延
壽代已為馮翊而有能名出其上故忌害陷以
危法理或然也夷考二子之治行則趙固明察
而韓尚德化似為過之

乙丑

左遷蕭望之為太子太傅

光祿勳平通侯楊惲有罪免為庶人

匈奴呼韓單于擊殺屠耆單于呼屠吾斯自立為
郅支單于

丙寅

丙吉卒以黃霸為丞相

丁卯

春匈奴呼韓邪單于稱臣遣弟入侍 郅支單于

攻呼韓邪單于走之遂都單于庭

以大司農耿壽昌言置常平倉

楊惲居家治產作詩自娛人告其驕奢不悔日食

之咎皆其所致下廷尉坐大逆腰斬妻子徙酒泉
諸在位與暉善者皆免官

戊辰甘露元年 甘露降改

以韋玄成爲淮陽中尉時淮陽憲王好法律有材
能帝欲立之因太子起於微不忍易以玄成讓爵
於兄故以玄成爲中尉以感動憲王太子始安
是年鐘簾銅人生毛

烏孫國亂分爲兩昆彌

己巳 趙充國卒

庚午 匈奴呼韓邪單于來朝還居幕南塞下

圖畫功臣于麒麟閣大司馬大將軍博陸侯姓霍
氏其次張安世韓增趙充國魏相丙吉杜延年劉
德梁丘賀蕭望之蘇武凡十一人

黃霸卒以于定國爲丞相

詔諸儒講五經同異於石渠閣立梁丘易夏侯尚
書穀梁春秋博士 皇孫鷲生

烏孫公主年老來歸

辛未

壬申黃龍元年 黃龍見於廣漢改元

匈奴呼韓邪單于來朝郅支徙居堅昆

帝寢疾以外戚史高為大司馬車騎將軍蕭望之為前將軍光祿勳周堪為光祿大夫受遺詔輔政領尚書事

十二月帝崩在位二十五年壽四十二謚孝宣皇帝廟號中宗葬杜陵太子奭即位年二十七是為孝元皇帝

癸酉漢孝元皇帝初元元年

立宣帝宮人王政君為婕妤尋立為皇后以公田及苑振業貧民賦貸種食罷宮館希幸者減穀食馬肉食獸

甲戌

帝任用宦官中書令弘恭僕射石顯誣奏蕭望之周堪及宗正劉更生朋黨下獄俱免為庶人夏四月立皇子鶩為皇太子

賜蕭望之爵關內侯 召周堪劉更生為郎中

帝欲相蕭望之恭顯許史側目劉更生上書地震乞退恭顯復誣下獄免蕭望之子亦上書訟望之事恭顯以望之教子上書失大臣體逮望之望之飲酖自殺帝驚拊手曰曩固疑其不就獄果然殺吾賢傳卻食涕泣哀動左右召顯等責問皆免冠謝良久乃止

弘恭死以石顯為中書令

乙亥 以賈捐之言罷珠厓郡

丙子 如河東祠后土

丁丑 匈奴婁單于殺漢使西走康居

戊寅 永光元年

詔舉質朴敦厚遜讓有行者 于定國罷

己卯 韋玄成為相 天雨草鷄生角

庚辰

辛巳 以周堪為光祿大夫張猛為大中大夫堪卒猛因

石顯誣譖自殺

壬午 以韋玄成言毀太上皇孝惠帝寢廟園

以匡衡為太子少傅

癸未 建昭元年

甲申 京房以易數得幸為魏郡太守石顯坐以誹謗下

獄棄市妻子徙邊

時僕射牢梁少府五鹿充宗附石顯擅權亂政

京房以孝廉為郎談易多驗帝悅之房謂帝曰

今天下治耶亂耶帝曰極亂耳今為亂者誰耶

房曰上最所信任與圖事於帷幄之中進退天

下之士者是也帝知其所指在石顯謂房曰已

論房又薦其弟子曉知考功課吏者為刺史臣
得通籍殿中奏事以防壅蔽石顯疾之建言以
房為魏郡太守以試其考課法房又上書竟徵
下獄以誹謗棄市初房學易於焦延壽延壽曰
得吾道以亡身者房生也其法以六十卦直日
用事以風雨寒濕為候各有占驗夫易也者吉
凶消長之理進退存亡之道寓焉占驗其餘事
耳房以新進遽欲人君去其所極親信者以信
已又薦其弟子為郡守而自己居中奏事寧有
是理乎此其所以取殺身之禍也故附錄以為

溺於占驗者之戒

乙酉 韋玄成卒匡衡為丞相封樂安侯

西域副校尉陳湯都護甘延壽矯制發兵斬郅支
單于於康居

丙戌 傳郅支首至京師懸梟街十日仍告祠廟赦天下

丁亥 帝疾復諸寢園廟

戊子 竟寧元年

匈奴呼韓邪單于聞郅支既誅且喜且懼入朝乞
為漢婿帝以後宮良家子王嬙字昭君賜之歸號
寧胡闕氏改元竟寧

封甘延壽為義成侯陳湯爵關內侯

石顯匡衡以延壽湯擅興師矯制如加以爵土則後奉使者爭欲乘危徼幸生事為國招難久之不封至是以劉向言始封之

夏五月帝崩在位十六年壽四十三謚孝元皇帝葬渭陵

六月太子驚即位年二十是為孝成皇帝以元舅王鳳為大司馬大將軍

己丑漢孝成皇帝建始元年

丞相御史奏石顯舊惡免歸故郡道死

司隸校尉王尊劾丞相匡衡御史大夫張譚阿附石顯衡譚謝罪尊左遷高陵令

封太后諸弟王崇為安成侯王譚王商王立王根王逢時俱賜爵關內侯

夏四月黃霧四塞 六月青蠅魚萬集未央宮殿中 秋八月兩月相承晨見東方

是年以匡衡言分南北郊

庚寅 立皇后許氏元帝傷其母許為霍氏所害故以車騎將軍許嘉女配太子至是立為后

匈奴呼韓邪單于死子復株累若鞮單于立

辛卯 秋大雨京訛言大水至

策免大司馬許嘉專任王鳳

地震未央宮殿求直言極諫士 越雋山崩

匡衡有罪免為庶人

壬辰 以王商為丞相封樂昌侯

召直言極諫之士對策白虎殿谷永策陰附王鳳

以為光祿大夫

癸巳河平元年

遣使塞河決 以王尊為京兆尹

甲午 封諸舅王譚為平阿侯王商為成都侯王立為紅

陽侯王根為曲陽侯王逢時為高平侯世稱五侯

沛郡鐵官冶鐵飛

乙未 河復決 劉向校中祕書上洪範五行傳

丙申 丞相樂昌侯王商忤王鳳詔收印綬以憂卒

以張禹為相 火生石中詔改元

丁酉陽朔元年

京兆尹王章奏劾王鳳下獄死

戊戌 以太后從弟王音為御史大夫

己亥 大司馬王鳳卒以王音為大司馬

潁川鐵官冶作亂平之

庚子

辛丑鴻嘉元年

帝寵幸侍中張放與之微行

張禹以老罷相位特進賞賜甚厚以薛宣為丞相
匈奴復株累單于死弟搜諧若鞮單于立

壬寅

飛雉集于未央宮承明殿

癸卯

王氏五侯奢僭踰制帝怒謝罪赦不誅

廢皇后許氏處昭臺宮

帝微行過陽阿公主家悅歌舞女趙飛燕召入
宮大幸有女弟復召入姿性尤醜粹左右見者

皆嗟賞披香博士淖方成唾曰此禍水也滅火
必矣姊妹俱為婕妤貴傾後宮譖許后與班婕
妤祝詛后坐廢班婕妤對曰死生有命富貴在
天修正尚未蒙福况為邪乎使鬼神有知不受
不臣之愬如其無知愬之何益故不為也帝善
其對赦之婕妤遂求侍太后於長信宮以免禍

甲辰

天雨魚

乙巳永始元年

封趙婕妤父臨為成陽侯欲立婕妤為后諫大夫
劉輔諫繫掖庭祕獄將軍辛慶忌等論救得減死

論為鬼薪

夏四月封太后弟子王莽為新都侯

太后兄弟八人獨莽父曼早卒不侯群兄皆將軍五侯子乘時侈靡以輿馬聲色游俠相高莽恭儉博學事母及寡嫂養兄孤子甚周備又外交英俊內事諸父曲有禮意大將軍鳳疾親嘗藥不解衣帶連月鳳且死以託太后及帝拜黃門郎成都侯商又請分邑封莽當世名士咸為莽言由是封為新都侯謙恭愈甚名譽益起

六月以健仔趙飛燕為皇后以其女弟為昭儀居

昭陽宮后寵稍衰居別館 劉向作列女傳

秋八月太皇太后王氏崩

丙午 王音卒以王商為大司馬衛將軍

前王商乃為樂昌侯丞相此王商乃成都侯王商五侯之一是時有兩王商

帝以太后命左遷富平侯張放為北地都尉涕泣而遣之

策免丞相薛宣御史大夫翟方進復以方進為丞相孔光為御史大夫

封太后姊子淳于長為定都侯

初帝欲立趙后太后以其微不許淳于長數言
之乃得立故帝甚寵長乃得封侯

王商惡陳湯免為庶人徙燉煌

丁未 南昌尉梅福上書

戊申 何武為京兆尹

巳酉 元延元年

王商卒以王根為大司馬驃騎將軍

槐里令朱雲上書求見請尚方劍斷佞臣頭帝怒
欲罪以死雲攀折檻辛慶忌叩頭救免

徵張放入侍中太后知之復出為天水屬國都尉

是年匈奴搜諧單于死弟車牙若鞮單于立

庚戌

辛亥 岷山崩壅江三日江水竭

壬子

癸丑 綏和元年

立定陶共王康之子欣為皇太子以楚孝王孫景
為定陶王奉共王後

以何武言改御史大夫為大司空與大司馬丞相
為三公 王根病免 罷刺史置州牧

淳于長下獄死許后自殺以王莽為大司馬

淳于長貴傾公卿與后寡姊嬖私通娶為小妻
后因嬖以金錢乘輿服御物賂長求復為健仔
長詒之曰我白帝以為左皇后通書悖謾王莽
忌長白于帝以太后故不治遣就國紅陽侯王
立故與長有怨至是使嗣子融從長請車騎長
乃以珍寶遺立上䟽乞留帝疑下吏按驗立令
融自殺以滅口帝益疑逮長下獄窮治長死獄
中后賜藥自殺立遣就國帝以莽忠直以為大
司馬年二十八莽聘諸賢良以為掾史賞賜邑
錢悉以享士愈為儉約母病公卿列侯夫人問

疾莽妻迎之衣不曳地布蔽膝見者以為僮僕
詢之方知其為夫人皆驚訝

甲寅 春二月熒惑守心命丞相翟方進自殺以當之葬
臨吊禮加厚

三月帝崩在位二十六年壽四十六謚孝成皇帝
葬延陵

大行柩前拜孔光為丞相 趙昭儀自殺

夏四月太子欣即位尊皇太后曰太皇太后皇后
曰皇太后

追尊定陶共王為定陶共皇 立皇后傅氏

尊定陶太后傅氏曰定陶共皇太后丁姬曰定陶
共皇后封丁明傅晏皆為列侯

劉歆為侍中更名秀典領五經輯六藝畧諸子畧
詩賦畧兵書畧術數畧方技畧諸子分為九流曰
儒曰道曰陰陽曰法曰名曰墨曰縱橫曰雜曰農
秋七月王莽乞罷就第士大夫多稱之恩寵加厚
置中黃門給使朝朔望以師丹為大司馬

詔定世宗為不毀之廟 何武免以師丹為大司
空 求能浚川疏河者賈讓上三策
是年馬生角

乙卯漢孝哀皇帝建平元年

策免大司空高樂侯師丹為庶人復賜爵關內侯
時冷褒段猶奏言定陶共皇太后共皇后不宜
復引藩國以冠大號又宜為共皇立廟京師眾
皆順旨惟孔光傅喜師丹以為不可故不合
以朱博為大司空

中山王太后馮氏及其弟宜鄉侯參俱自殺

馮太后馮奉世女也與傅太后並事元帝為健
仔從幸虎圈熊逸出攀檻傅驚走馮直前當熊
而立帝問之對曰猛獸得人即止恐至御座故

以身當之帝嘉嘆傳慙成隙後馮后從子中山王之國中山王卒幼子箕子肯病后祠禱為解哀帝遣張由視疾遂誣言馮后祝詛遣御史案治魚所得命中謁者令史立受傳太后指治馮女第弟婦死者數十人誣奏祝詛謀反大逆責馮后不服立曰熊之上殿何其勇也今何怯也太后還謂左右曰此廼中語前世事吏何用知之是欲陷我效也乃飲藥自殺弟宜鄉侯召至廷尉亦自殺馮氏死者十七人衆莫不憐之

丙辰 策免大司馬傅喜罷三公官以朱博為御史丁明

為大司馬衛將軍

策免孔光以朱博為丞相尋下獄自殺以平當為丞相

詔共皇去定陶號立廟京師尊共皇太后傳氏為帝太后共皇后丁氏為帝太后丁氏尋崩

罷州牧復置刺史 免師丹為庶人王莽就國

六月帝疾以待詔黃門夏賀良言改元太初更號陳聖劉皇帝疾不愈罷改元改號誅夏賀良

丁巳 平當卒王嘉為相

戊午 關東訛言行西王母壽

尚書僕射鄭崇以諫董賢下獄死
賜董賢爵關內侯尋封為高安侯

巳未元壽元年

以傅晏為大司馬衛將軍丁明為大司馬驃騎將
軍晏尋罷

丞相新南侯王嘉論董賢下獄自殺以孔光為丞
相何武為前將軍彭宣為御史大夫

庚申

春二月匈奴單于烏孫大昆彌來朝

正三公分職董賢為大司馬孔光為大司徒彭宣
為大司空

六月帝崩在位六年壽二十六謚孝哀皇帝葬義
陵董賢與妻皆自殺沒其家財四十三萬萬父
恭與家屬徙合浦

以王莽為大司馬領尚書事

秋七月太后與王莽議迎元帝庶孫中山王箕子
為嗣 貶皇太后趙氏為孝成皇后徙北宮徙孝
哀皇后於桂宮尋廢就園俱自殺

追貶傅太后為定陶共王后丁太后為丁姬

王莽薦孔光壻甄邯為侍中策免將軍何武遣紅
陽侯立就國策免彭宣以王崇為大司空

秋九月中山王箕子即位是為平帝太皇太后王氏臨朝王莽秉政

以孔光為帝太傅馬宮為大司徒

辛酉漢孝平皇帝元始元年

益州外夷稱越裳氏獻白雉一黑雉二王莽白太后薦宗廟群臣盛稱莽功德宜號安漢公益爵邑莽上書言孔光等同定策以孔光為太師王舜為太保甄豐為少傅甄邯封承陽侯莽固讓數四稱疾不起群臣復上言宜加元功無使百僚失望乃以莽為太傅安漢公益封二萬八千戶莽惶恐不

得已受安漢公號讓益封復請褒賞宗室

以帝母衛姬為中山孝王后帝舅衛寶衛玄賜爵關內侯皆留中山不得至京師

封魯頃公八世孫寬為褒魯侯褒成君孔霸孫均為褒成侯以奉周孔祀追封孔子為褒成宣尼公

壬戌

帝更名衍 黃支國獻犀牛

王崇免以甄豐為大司空

光祿大夫龔勝太中大夫邴漢辭位去梅福棄官去不知所之

王莽諷匈奴單于以王嬙女湏卜居次入侍太皇

太后須卜氏名居

癸亥 聘安漢公王莽女為皇后

王莽欲女為后以固寵乃上言長秋宮未建掖
庭媵未充請考論五經定取后禮正十二女之
義博采二王後及周公孔子世列侯在長安者
適子女事下有司上女名王氏女多在內莽又
言子材下不宜與眾並采太后乃詔王氏朕外
家其勿采庶民諸生郎吏以上守闕者千餘人
公卿大夫咸詣廷中皆言安漢公勲德堂堂願
得公女以母天下太后乃從之

有司言古者天子封后父百里尊而不臣以重宗
廟請以新野田二萬五千六百頃益封莽辭不受
故事聘皇后黃金二萬斤為錢二萬萬莽辭止受
四千萬而以三千三百萬予十一媵家詔復益二
千三百萬莽復以其千萬分子九族貧者

王莽殺其子宇滅中山孝王后家又殺敬武公主
汜鄉侯何武司隸鮑宣等數百人

莽子宇以莽隔絕衛氏恐帝長大致怨通書衛
寶教衛后上書謝恩冀得至京莽白太后益湯
沐邑衛后日夜啼泣思見帝面復上書求入莽

不聽宇與師吳章及婦兄呂寬議以莽信鬼可
為變怪以懼之使寬夜持血灑第門吏覺之莽
執宇送獄飲藥死并殺宇妻甄邯等白太后下
詔以莽居周公之位行管蔡之誅莽盡滅衛氏
之族吳章腰斬磔尸東市元帝女弟敬武公主
素附丁傅復非議莽紅陽侯立莽之尊屬平阿
侯仁素剛直皆以太后命逼令自殺甄豐遣使
窮治黨與凡郡國豪傑漢臣忠直不附莽者皆
誣以罪何武鮑宣王商辛慶忌子皆坐死死
數百人

吳章當世名儒弟子千餘人禁不得仕宦盡更
名他師平陵云敞時為大司徒掾自劾吳章弟
子收章尸棺斂之

北海逢萌掛冠而去客於遼東

甲子 春二月迎安漢公莽女入宮為皇后赦天下

群臣上書請加王莽宰衡位諸侯王上

賜王莽母號功顯君食邑二千戶金印赤黻莽子
安為褒新侯臨為賞都侯太后臨殿莽拜前二子
拜後如周公故事莽固辭詔諭始受 起明堂辟
雍靈臺立樂經徵天下通經異能之士及能治河

者 尊孝宣廟為中宗孝元廟為高宗

更定官名及十二州界 遣太僕王暉等八人行
天下觀風俗

乙丑 孔光卒以馬宮為太師

群臣上言加王莽九錫吏民上書頌功德者四十
八萬七千五百七十二人

此後世權臣受九錫之始古者諸侯有德天子
錫之一車馬再衣服三虎賁四樂器五納陛六
朱戶七弓矢八鐵鉞九秬鬯

王暉等回言天下風俗同詐作歌謠頌功德凡三
萬言王莽咸封為列侯

廣平相班穉獨不上嘉瑞歌謠琅邪太守公孫闓
言災害甄豐劾閔穉不道闓下獄誅死穉班健仔
弟也以太后言歸相印補延陵園郎

王莽奏市魚二價官魚獄訟邑無盜賊男女異路
犯者象刑

發定陶共王母及丁姬冢取其印綬 太師大司
徒馬宮罷 宗室劉慶上書請王莽攝行天子之
事群臣皆曰宜如慶言

冬十二月帝益壯以衛后故不悅王莽莽因臘日

於椒酒中進毒帝飲之疾王莽作策請命泰時願
以身代藏策金滕戒諸臣勿言帝尋崩在位五年
壽十四謚孝平皇帝葬康陵莽令天下吏六百石
以上皆服喪三年

尊孝成廟曰統宗孝平廟曰元宗

太后與群臣議立嗣時元帝世絕而宣帝曾孫見
王五人列侯四十八人莽惡其長大曰兄弟不得
相為後乃徵宣帝諸玄孫選其最幼者托以下相
吉立之

前輝光謝贛奏武功長孟通浚井得白石丹書文
曰告安漢公莽為皇帝莽使群臣白太后太后曰
此誣罔不可施行太保舜曰事已如此無可柰何
莽非有他意但欲稱攝以重其權鎮服天下耳后
力不能制乃詔選宣帝玄孫嬰為平帝後而以王
莽居攝踐詐服天子衣冕背斧依立於戶牖之間
南面朝群臣

丙寅漢孺子嬰居攝元年

春三月立宣帝玄孫為皇太子年二歲廣賊侯勳子顯之子

尊皇后王莽女為皇太后以王舜為太傅左輔甄
豐為太阿右拂

夏四月宗室安鄉侯劉崇與其相張紹謀起兵討
莽不克敗死崇族父劉嘉詣闕歸莽請赅崇宮室
示戒莽悅封嘉率禮侯子九人皆賜爵關內侯
五月群臣以王莽權輕致有謀逆請於太后稱假
皇帝

丁卯 故相翟方進子東郡太守翟義立嚴鄉侯劉信為
天子起兵討莽三輔豪傑起兵應之衆十餘萬莽
惶懼不能食抱孺子禱郊廟謂群臣曰昔周公攝
政而管蔡挾祿父以畔今翟義亦挾劉信作亂自
古大聖猶懼况莽乎群臣皆曰不遭此變不章聖

德莽依周書作大誥示反政孺子諸將攻翟義敗
死劉信亡走莽發翟方進冢及其祖墓燒其尸棺
夷滅三族

班彪曰丞相方進以孤童携老母入京師身為
儒宗致位宰相盛矣當莽之起蓋秉天威雖有
賁育奚益於敵義不量力懷忠憤發以隕其宗
悲夫

戊辰

王莽稱初始元年

群臣奏請加王莽子安臨爵為公兄子光為衍功
侯孫宗為新都侯

秋九月王莽母功顯君死如天子吊諸侯禮服總以孫宗主喪

十一月太后詔王莽奏事毋言攝以居攝三年為初始元年

十二月梓潼人哀章作銅匱獻王莽以為神禪受於高廟御玉冠謂太后還坐未央宮前殿即真天子位改國號曰新以十二月朔為始建國元年

王莽欲即真以符瑞白太后太后大驚是時孺子未立璽在長樂宮莽請璽太后不與莽使安陽侯舜諭指太后怒罵曰而屬父子宗族蒙漢家力富

貴累世乘便奪取其國不顧恩義天下豈有而兄弟耶且若自以符命為新皇帝當自作璽何用此亡國之璽我旦暮且死欲與此俱葬舜曰莽必欲得璽太后寧能終不與耶太后乃以璽投之地曰我老且死知而兄弟今族滅莽得璽大悅

王莽族屬王諫上書言皇天既立新室太皇太后不宜稱尊號宜隨漢廢冠軍張永獻符命銅壁文言太皇太后當為新室文母太皇太后莽下詔從之

班彪漢元后贊曰三代以來王公失世稀不以

女寵及王莽之興由孝元后歷漢四世為天下
母享國六十餘載群弟世權更持國柄五將十
侯卒成新都位號已移於天下而元后卷卷猶
握一璽不欲授莽婦人之仁悲夫

按王莽媚侍元后無所不至后三姊妹皆食湯
沐邑旁側長御以下賂遺以十萬數甚至弄兒
病在外皆親候之故上下交相稱譽以成其篡
然太后以婦人墮其術中固矣獨恠夫漢廷諸
臣雷同隨聲稱頌功德無一人知君臣之義者
何哉

巳巳 王莽始建國元年

春正月廢孺子為定安公以孝平皇后為定安太
后

王莽策命孺子封以萬戶地方百里立漢宗廟
於其國與周後並行讀策畢執孺子手流涕歔
歔曰昔周公攝位終得復于明辟今予獨迫皇
天威命不得如意哀嘆良久中傳將孺子下殿
北面稱臣百官陪位莫不感動使者監定安門
第戒乳母不得與語常在四壁中長大不能名
六畜

改漢官名降漢諸侯王為公以漢高祖廟為文祖廟 漢宗室劉快起兵討莽不克而死

禁卯金刀 禁民不得買賣田及奴婢

遣五威將帥班符命吏印綬收漢印綬

庚午 五威將還奏漢諸侯王為公者悉上璽綬為民以

獻符命封侯者三人

更號定安太后為黃皇室主

王莽以符命僭位欲絕其原以神其事甄豐子尋

劉歆子棻復作符命獻莽又云黃皇室主當為尋

妻棻怒捕下獄甄豐自殺連及公卿親黨數百人

以劉棻嘗從楊雄學竒字收雄雄方校書天祿閣

自投閣下幾死棻以雄不知情免

甄豐附棻成衛后之獄乃自及其身天之報何

其速也可為附和權臣者之戒

以方士言起八風臺

辛未 徵龔勝為太子師友祭酒不食而卒

壬申 復令民得賣田

癸酉 漢太皇太后王氏崩年八十四葬渭陵與元帝合

而溝絕之立廟長安新室世世獻祭元帝配食坐

於牀下

初莽媚太后以元帝廟為高宗百世不遷及僭位廢孝元廟以為文母寔食堂名曰長壽宮置酒請太后太后見廟廢驚泣不樂而罷莽更漢黑貂為黃貂又改漢正朔伏臘日太后令官屬仍黑貂漢臘日獨與左右相對飲食

以明年為天鳳元年

甲戌 王莽天鳳元年

乙亥

丙子 王莽捕獲翟義黨王孫慶使太醫尚方巧屠其剝剔之量度五臟以竹筵導其脉知所終始可以治

病

後世醫家銅人圖十二脉絡蓋本於此

丁丑 王莽鑄威斗如北斗狀出入令人負之以厭勝是年綠林兵起

戊寅 楊雄死

巳卯 王莽欲擊匈奴募奇士或言廣水不用舟楫連騎而濟百萬師或言不持斗糧止服藥物三軍不飢或言能飛一日千里莽心知不可欲獲其名厚賜之

東海連率韓博上言奇士巨毋霸長一丈大十圍

輶車不能載三馬不能勝以大車四馬載詣闕王
莽字巨君惡之更其姓曰巨母氏以博非所宜言
徵下獄論棄市

王莽以盜賊多令大史推三萬六千歲歷紀六歲
一改元布天下自言當如黃帝升天以誑耀百姓

庚辰

王莽改地皇元年從三萬六千歲歷號也

鉅鹿男子馬適求等誅莽不克而死

郅憚推曆數說莽就臣位繫獄會救出

辛巳

王莽子臨謀殺莽事覺自殺 王莽毀漢高廟
南郡秦豐兵起

壬午

樊崇兵起王莽太師王匡更始將軍廉丹擊之崇
恐其衆與莽兵亂皆朱其眉人謂之赤眉匡丹兵
放縱東方歌曰寧逢赤眉莫逢太師太師尚可更
始殺我

廉丹掾馮衍說丹曰新室之興英俊不附人心
思漢天必從之為將軍計莫若此據大郡鎮撫
吏士納雄俊詢忠智興社稷之利除萬人之害
福祿流於無窮功烈著于不泯何與軍覆中原
身膏草野功敗名喪耻及先祖哉丹不聽與赤
眉戰敗匡走丹曰小兒可走吾不可走遂戰死

廉丹不知大義反為莽死所見謬矣哉

漢宗室劉演劉秀起兵舂陵新市平林兵皆附之
漢景帝子長沙定王發生舂陵節侯買買生戴
侯熊渠熊渠生考侯仁仁以南方卑濕徙南陽
與宗族往家之仁子敞嗣值莽篡位國除節侯
少子外為鬱林太守外生鉅鹿都尉回回生南
頓令欽欽娶湖陽樊重女生滎仲秀秀時年二十
八宛人李守好星曆讖記嘗謂其子通曰劉氏
當興李氏為輔及新市平林兵起南陽騷動演
遂號召豪傑而起

王國寶人代紀要卷之八終

